

د/يسرى العزب

مطبوعات الفجر  
19

# فارس جامع

شعر بالعامية المصرية

ليلى محمد على

-٢٠٠٠-

# مطبوعات الفجر

تصدر عن جماعة الفجر الأدبية بالقاهرة  
١٥ ش محمد منصور ارض اللواء - فيصل (الهرم)  
تليفاكس ٥٧٠٢٢٤٢

رئيس التحرير : دكتور / يسرى العزب

غلاف ورسم : أحمد الجنايني

رقم الإيداع : ٢٠٠٠/١٤٩/٩  
غلاف ولوحات داخلية  
ISBN : أحمد الجنايني

## المحتوى

الصفحة	القصيدة	الصفحة	القصيدة
٤٣	دمعة مطر	*	إهداء
٤٥	جوانا إيه ؟	٥	خط ابيض
٤٧	شربان حياة	٧	ويهم إيه ؟
٤٩	خلي بالك	٩	كون جديد
٥٣	وحيت طاير	١٣	شمس دافية
٥٧	إيه الفرق ؟	١٧	كبرياء
٦١	على كيفهم	١٩	جنون
٦٣	أميرة والبهلولان	٢١	مزاد
٦٩	بين البينين	٢٣	ميعاد
٧٣	وتترف شىء	٢٥	شمس
٧٧	كلام مجنون	٢٧	ضد الرجوع
٨١	حبيب جاحد	٣١	قمر فضة
٨٣	صورة	٣٥	مساحة صمت
٨٥	طريق بكرة	٣٩	فرس جامح
		٤١	سفينة نوح

## الإهداء

الى .....  
يا عمر العمر يا يوسف ويا اجمل بيوت الشعر  
بتتسابق تشوف الطابع الرباني فوق وشك  
ولما عنك يا جو تضحك بتضحك لك  
ليالى الدنيا فى قلبى وتفرح بك  
ينور دنيتى نجمك  
وتاخذ جزء من حقى اللى ماکملشى  
وحانتظرك بشوق تحبى عشان تمشى  
وعمرى معاك يقوم يجرى  
ويدعى لك ..  
يحتاجى عليك ..  
ماتحزنشى .

ليلى محمد على  
أغسطس ٢٠٠٠

سلام  
وننام على حافة ليالى الدنيا  
والاحلام

نقوم نمشى  
ونسحب خطوة اقدامنا  
م الماضي

مانعرفشى  
نروح على فين  
ونتشاور

نشاور نوقف الليلة  
على فكرة مابتنامشى  
تموت في عنينا ميت نظرة

نحاول نضحك الضحكة ما تطلعشى  
ونبعد خطوة عن خطوة  
وننسى وجودنا بالمرّة

إشارة تنور السكة  
تكدّرنا  
نروح لابتعد حدود الحلم

وباقى منه خط ابيض  
مانفهمشى  
نكدب روحنا نجرى عليه  
ونقرا جملة واحدة فوقيه  
نهاية كل شى الان  
نحاول نرجع السكة من الاول  
ما نقدرشى  
ستايير خوفنا م اللى جاى  
بتحجب عنا اى كلام  
ونتمنى ما نوصلشى  
سباق لمكان اخير مجهول  
ولحظة واسمنا ينزل  
في آخر صفحة م الاهرام  
ما ينزلشى  
ما تفرقشى

١٩٩٨/١٠/٣٠

فرس جامح



في الهادي بين الموج رأيت  
سفن الغياب  
فاردة الشراع بتقول تعالى  
وعنيا فوق قطب الشمال  
جبليين جليد  
صمت وضياح  
زاهدين صمودى وارتحالى  
بالقلب رايعين للجنوب  
خاضعين لتيار الليالى  
مديت إيديك لى احتويت  
ثورة كيانى وانفعالى  
والدفا نهر فم عينيك  
والبعد بين شطين محال  
يجتمع إسمى وإسمى  
لو خيال  
لحظة غروب  
او ذكرى ومجرد سؤال  
غايته الهروب فوق احتمالى  
إيه معنى اكون باغرق واموت  
حزن وسكوت  
والقاك في لحظة خوف قبالى ؟

إيه معنى لما تكون إيديك  
لمسة حنان  
في القلب بتبدل خيوط العنكبوت  
حب وأمان  
وتمدها لي  
طوق للنجاة ؟  
أرمى له قلبي بالحياة  
يرجع لجوف البعد خالي  
ويهم إيه  
إن جه أو ان الموت  
وضم الكون معاه  
مادمت فيه  
يهم إيه  
إن كات رياح الخوف  
جنوبي  
أو  
شمالي

١٩٩٨/١٠/٤



بعيد بعيد  
فيه كون جديد راح يتولد  
راح يغسل الروح و الجسد  
فى نهر وادى للأمل  
ويعيش سعيد مليون أبد  
بتقولوا إيه.....  
فيه نسر واقف ينتظر  
و يبص للوادي الجميل اللي اكتمل  
طب يعنى إيه  
ده اللي حصل لو تعرفوه  
كان معجزة  
يا اااه  
كان معجزة بحق و حقيق  
ما فهاش جدل  
النسر أصله كان حمل  
واتوحش الضعف اللي فيه  
لما التقى

كل المشاعر زيف في زيف  
و الخوف مقابل كل شيء عند الضعيف  
ما تصدقوش  
النسر عمره ما كان مخيف  
يا ألف لا .....  
من وسط ألوان الربيع  
اتكوّنى  
يا صرخة الألم الوجيع  
اتلوّنى  
أنا عايزة صوتك فى الفضاء  
رفض لجميع الأسئلة  
ده القلب الاخضر ع الشجر  
واصل بدقاته القمر  
يزرع فى ضيه سنبله  
تطلع بشاير للملا  
ينزل لها النسر المهاب  
بجناح مخضب بالعذاب  
محروم ينام خالى الضمير  
حيعيش أسير

و يحط ع الشوك و الكلا

يا للا يا دنيا جديدة جدّا

اظهري

واتطهري يا قلوب بقى

قيمي الصلاة للى نوى

ده الحب فاض

و القلب من نبعة ارتوى

و امتد فوق الأزمنة

حتى اعتلا سحب السما

عرشه استوى

معنى و فعل و محتوى

١٩٩٩/٢/٨



فرس جامح



فرس جامح

ما تدوريش وشك  
نواحي القبله تنسى  
و تسيبيني  
إما اكونك أو كونيني  
هددى الخوف اللى فى  
جددى لهفة عنيا  
مهما حابعد  
قلبي ساكن بين إيديكى  
بينادينى  
قوتيه و هدهدينى  
بين ضلوعك بالحنان  
صدقينى  
قلبي حسك فجر شفتى  
فوق جبينى  
قولى مين يستجرى ياخذك  
من وجودى



لو حنينى يوم رسم لك  
فوق حدودى  
لون سنينى الجاية منك  
شكلينى و كوينى تانى فيكى  
و ان ما كنتش يوم بلونك  
زى ما تحب الليالى بكل شوقك  
لونينى وان لقيتى فى شىء  
ما فهو شر، حروفك  
إشطبينى من تاريخك  
مش حالومك  
لا ..... حاقول لك  
عيشى إنت  
و احرمينى إنى احسك  
أو أعيشك  
و ان قدرتى  
دورى وشك و دارى  
عنى طيفك

حتلاقينى

زرع أخضر مالى أرضك

شمس دافية

و ميه صافية

ف نور عينيكى

و ان سامحتى

قربينى

و اشجى فى الضلعة خوفى

إن سمحتى

احضنينى

وللمى اللى اتشت

من تشكيل حروفى

١٩٩٩/١٠/١٧

فرس جامح



فرس جامح



بنعید کلامنا بالسکات  
لحظة تبکی فیها کل الأحساسات  
یصحی ألمنا  
و نقبل الوضع المهین  
جبلین عناد  
بینهم بلاد لهفة و حنین  
قلوبک حلیم  
و انا قلبی ضیعتہ انتظار  
رافض یلین  
نار قدتها جوه الهشیم  
و انتفض برکان مشاعر م الثبات  
حلم کان لی مستحیل  
یتولد من تانی جوانا الی مات  
و راح أوانه الی اکتمل  
ما وصلش أبدا للأصیل  
مهما بان لی ده صعب جدا  
کان بیدخل جوه صدری  
شیء جمیل

أنسى روجي فيك واطير

كام زمن جواك يعدوا

مش كثير

إلا لحظة حب واحدة

تنجرح فيها المشاعر

قلبي ينزف شوقه ويل

و النهاردة عنيا ما بتبكيش دموع

بابكي حبي

كبرياء و شموخ نخيل

بابكي عمر حروفه إنت

و ليه صبحنا صورة باهتة

و ضى خافت للشموع

سر ساكن فى الضلوع

داب تمرد فى عصي

حتى ضعفى ع الخضوع

صحى كل مشاعري معنى

قسى قلبي ع الرجوع

و النهاردة لما بابكي

عينيا ما بتبكيش دموع

عنيا ما بتبكيش

عنيا

١٩٩٩/٢/١٥

فرس جامح

بيلوموني  
لما اكون في الحب دايمًا عاقلة جدا  
ويلوموني برضه ..... لو .....  
فكرت أقاسمك في الجنون  
كل شيء في عني أصبح مش حقيقي  
وش عاشت فيه ملامحك ألف لون  
بس كل مشاعري واخدة ع التحدي  
واقفة وحدي  
ضد كون  
ثورة تكتب كاف و نون  
كن حنون  
لما اكون مشتاقة راحتي  
كن بساط الريح لعندي  
لما تصحى في غيرتي  
وخطى بحر الليل معايل معاي  
شد روحى السابحة ضدي

بيلومونى

بس دايماً حيلاقونى

عاقلة جداً فى الحياة

أما لحظة ما تخاصمنى

بابقى واحدة تانية خالص

جمرة فوق بركان جنون

١٩٩٩/٣/١٥

فرس جامح

لما تتكثف إيدينا  
لحظة ونغمض عيننا  
نلقى رجلينا الضعيفة  
فوقها حمل كبير بيضغط  
كل شرايين الحياة  
ضعف يخطف من همومنا  
لون غريب ناقشاه كفوفنا  
فوق جدار الخوف مانعرف  
إيه مخبي الليل وراه  
يعمى شوفنا  
نجرى جوه العتمة تتخبط حروفنا  
قلنا يمكن يومها تلحق  
من خيوط الشمس نمسك  
خيط حقيقى فى الضلام  
أو نوّدع ليل بيرسم  
فوق وشوشنا الزيف كلام  
ضم كام مليون حكاية من ألمنا  
خلى خوفنا معادلة صعبة

واللى أصعب  
لو يفك رموزها واحد م الحواة  
أو نطبع مّر حالنا  
مّر غمين مانقولش لا  
مش حنقدر حتى ننطق  
مش حنسمع  
مش حنجمع إيدنا إلا  
مرة واحدة ف قيد ونخضع للمبايعه  
نمشى فوق الشوك حفاة  
حفنة م الأحلام في دنية حب ضايعة  
دورنا فيها ريح نبعت بيه كلامنا  
في اتجاه معنى واحد  
إن طاوعنا الخوف وبعنا إحساساتنا  
للى يدفع فيها أكثر  
ليه حنعتب ع الضمير اللى نسيناه  
ما احنا بعنا في المزايدة كل شيء  
وبخاطرنا  
سبيننا غيرنا  
إشتراه

كان الوقت اللي انا فاكراه  
 من كل الماضى دقائق صوت  
 لما وقفت فـ قلب الريح  
 وشفت الليل جوايا بيفتح  
 كل زوايا الجرح وتخرج صورتك منى  
 يصحى اليوم النايـم فى جوه تابوت  
 والقى الصبر بيحفر حزنى  
 بين ضلعين الدنيا القايمـة ف حضن الموت  
 كات حبات الدمع ياقوت  
 مع دقائق الوحدة ف صدرى  
 بتخفق سرى  
 تحرم روى الزاد والقوت  
 قالوا انتظري دقائق ثانية  
 قلت العمر ف ثانية بيجرى  
 مين يضمن لى أمانى الضايـع  
 يملا شوارع قلبى بيوت  
 يزرع فى المواعيد الساكنة حروف الذكرى

ضى بيرجع بعد خفوت  
دايما كان من حقى انتظرك  
تانى وتالت  
أبكى وابسمل لما بتفرح  
واما الدنيا بتاخذك منى  
والقاك تسرح  
ارقى حروف الشوق بدموعى  
واحفر اسمك فى الملكوت  
ضى لنن العين مشدود  
نفسه يضمك قبل ما اروح  
خايفاك تنسى ميعاد مش لى  
كان لسنين عايزاك قبل  
ملوا سكوت

١٩٩٩/٣/١٠



ندا مجهول  
 وصوت أخرس على لساني  
 بيصرخ جوه في وداني  
 لفين نهرب ؟!  
 سفينة غربتي ماشية  
 ببطيء شديد  
 زمن أصعب وحس بليد  
 يلف الخوف على رقبتى  
 يشد وجودى بالقوة  
 ويطوى شروقى في المغرب  
 ويتسربسب لعمق البحر  
 لفين الرحلة واخذانى ؟!  
 وانا على البر شايفانى  
 هناك باغرق  
 وحاسانى جسد مهدود  
 بيتمزق

وبابعد بدراعاتى الخوف  
وموج الغربة يلعب لى  
وباتغلب على تعبى  
والم الروح من التجاوىف  
صدى إحساس بيتعجب  
واخاف لانسى  
شروق الشمس  
في لمحة رايحة بالأيام عشان تحجب  
بريق بكرة  
بعيد عن أرض أحلامى  
يغيب حبى ف عيون الناس  
يهاجر همس  
واروح ما ارجعش

١٩٩٩/١٢/٢٠

فرس جامح

الزمن ده شىء عجيب  
صار له معنى جديد غريب  
زمن انتظار المعجزات  
لما يبجى المهدى تاير كاللهيب  
بيقول كلام  
والمعنى في الفعل المضاد  
والضحكة مالهائش أى لون  
الطعم ماسخ  
والحلق مرر م السكات  
واللبن بقى خوف بيجرى بالهموم  
نار في صدر الأمهات  
والشوق جنون  
والحب أصبح كلمتين  
خد وهات  
علمت قلبى كل شىء  
إلا إنى أبقى واقفة ع الحيات


وسط الطريق دايرة سكون  
 أو ضل تابع مستكين  
 بانتظر رجعة ثمود أو أهل عاد  
 وارفع رايات النصر وتموت الغايات  
 وأنا قلبي زهرة  
 عطرها في الأرض عاشق للعناد  
 طلعت لبكرة المستخبي بين حروف المستحيل  
 بستان أمل  
 وبيت من الصبر الجميل كله مرايات  
 للشمس تدخل بالدفا  
 عكس اتجاه الحزن  
 في العمر اللي فات

تفقل ببيانہ ع الاصيل  
ويشقق الفجر حكايات  
مدت جدورها ف قلب ليل  
نوره بيوصل للسحاب  
يكتب بصمت وكبرياء  
ضد الشتات  
العمر ماشى بالسنين والذكريات  
من غير جموح  
والروح حتنزل م الفضاء  
خطوة قدم  
ضد انهزام القلب  
فوق خط العدم  
ع الأرض دبت كالوتد  
من غير خضوع  
ضد الرجوع  
ضد الرجوع  
ضد الرجوع

١٩٩٨/٩/٣٠



فرس جامح



فرس جامح

و لو بالكذب ...  
ما قدرتش فى يوم أنساك  
و انسجى العين دموع فاكراك  
و اهاود عقلى ...  
و أتتهاون فى حقى معاك  
و اقدم بالزمن خطوة  
أشوفك ذكرى ع الهامش  
و فكرة ف منتهى القسوة  
ليوم عايش على لقياك  
و سبته هناك  
كلام منقوش على المرمر  
قمر فضة بيتخبى  
فى عز الليل من الحساد  
و يسهر فى المدن مطفى  
مالوش مطرح  
وميض خايف

لا يوم يفرح تشوفه الناس  
بيتبعتر فى كل نهار  
دموع فوق الشجر الاخضر  
بتطوى همومى و تسافر  
بشوقى وراه  
و صبرى ليه و لا أيوب  
مالوش آخر  
و قلبك ليه جبل صامد بيتحداه  
سؤال فيه امتحان  
أصعب من الفرقة  
و انا لسه  
و من أول خطأ القصة  
على وعدى  
ما فكرتش فى يوم انساك  
و لا صعبتش على نفسى  
ما دامت قسمتى وياك  
ربيع منسى



و لا باعتبش ع الدنيا

الطريق الصعب

و لا فرقنا فيه عن بعض

ما دام حتكون لى من تانى بدايات تانية

راح استناك

هتتقيد فى عمرى خطاك

و تبقى فى اللى جاى قدرى

و اكون لك

فى الزمن ده .....

قضاك !!

١٩٩٩/١٠/٥



فرس جامح



فرس جامح



مسافة ميل  
مساحة أرض مزروعة  
شجر ونخيل  
مائيش خايقة أكون وحدي  
وتخدعني السكك وياك  
أنا عارفة  
ميتين خطوة كما خطوة  
ماتفرقشي  
حدود أرضك  
طريق آخره هنا عندي  
تجيني طيف أمل سابح  
بيطوي شوارع اللهفة  
نفس بردان  
شعور تعبان من المشاوير  
باضمه لحضني يتدفى  
يكن أمان

ياريته جه سنين بدرى

بصيص م النور

فى ليل عمرى

مسافة ميل

مساحة أرضك الخضرة

بتدينى أمل بكرة

عينيك وعينيا يتقابلوا وتتصالح

على امبارح

ونتقوت من النظرة تشبعنا

بكلمة تجرى فى عروقنا

دما واحدة

تسيل نقطة بميت معنى

مانبكيشى على الفرقة

بنبكي ع اللقا صدفة

بيجمعنا فى أى مكان

مساحة صمت للغربا

بيتساءلوا على القسمة

ومين فرق ومين جمع  
ومين خلى باسم الحب  
دقة تروح مكان دقة  
قلوبنا تدوب فى بعضيها  
مانعرفش  
وقوفنا . كان فراق موقوف  
والا وقوف عشان نمشى  
مابيهمش  
قلوبنا خلاص بقت حرة  
ماعادتشى على أرض البشر إنسان  
عشق إنسان  
مسافة صوت  
بيعلن فرحة للأكوان  
مساحة موت  
كيان فى كيان  
لكنه موت غريب محبوب  
بيخلق فيه زمن مولود  
لكل أوان

١٩٩٨/١٢/١٢



فرس جامح



فارس جامح



وبعد ازاي  
بقى لنا ايه ؟  
وصلنا بدرى جدا ليه ؟  
وكان مشوارنا متقدر  
عليه مليون سنة واكثر  
عشان ننهيه  
قطعنا كل ده ف لحظة  
ومن اول خطا القصة  
وخطوة تجرّ في الثانية  
تكبر خوفنا في الثانية ميتين مرة  
لقينا البحر قدامنا على وسعه  
مابيننا يضيق  
وقالوا : غريق ما بين الموج  
في دوامة  
بتتكالب عليه ياما  
وشوش تسال  
لحد الوقت ما غرقشى ؟



وعايش والا مش عايش ؟  
وليه قادر ومستحمل ولا عرفشى  
لفين راحل ؟  
وتتجمع غمامة سودة م الطوافة والرحل  
ولا واحد قدير يدعى ويتشفع  
لساعة موته ويصحيه  
ولا يراهن على شمسه

اللى راح تطلع

هيرجع والا مش راجع  
زمن صايح  
في نور عمال بيتراجع

يفرقنا

خرج منها فرس جامح  
وماقبلشى يعيش راجع  
وساب الدنيا دي لناسها  
مايملكشى  
غير انه يموت هناك واقف

على رجليه

٢٠٠٠/٢/١٩



سوا جينا  
لنفس الركن م الدنيا  
بتتسابق خطاويننا  
وفي عينا صور أشباح بيتراقص <sup>بشراقص</sup>  
ويوم ناقص عليه خطوة  
في علم الغيب  
وما عرفناش  
لا نتحدى الزمن والخوف  
ولا نعدى حدود الشوف  
حتستنى كتير واقف هناك ع الشط !!  
بقى لنا سنين بعيد عن بعض  
ماقربناش  
لحد امتى حنستحلى الحياة دى سكوت  
مانقدرشى نحوش الموت  
فى موج بيعافر اقدامنا  
وجنيّه بتندهنا  
بصوت مخنوق ماريجنيش

تقول لى : انسيه  
نصيبك ملح فى الميه  
وبير زمزم بيتعكز  
ولو مليون ماتتوضيش  
دموعه الباردة راح تنزل  
على الودعة ماتعرفكيش  
ونجمك فى السما مخالف  
بيتحالف شتا ومطرة  
وغيم زاحف على قلبك مايدفيش  
حاولت كثير ارجع لك حروف اسمه  
ماطاو عتنيش  
قفلت الباب ما بين قلبين  
على امبارح  
بقيتوا اتنين بدل واحد  
بينتظروا على المينا سفينة نوح  
على أمل اللى كان جايز يروح  
ويعيش .....

اسم السارح؟

فرس جامح

دمعة

مطر

نزلت على وتر الكمان

هزت أمان ليلة شتا

قلبي ارتجف

م الخوف لمعنى الأغنية

لا تكون فراق

عزفت صوابك فوق دقائق

عشتها

نغمة رضا

طائرة لسحابة فى الفضاء

بالاشتياق

قد إيه راح م الزمن

واحنا ف طريق

حرّم علينا كل شىء

حتى الممات

لحظتها نزلت دمعى فى الجوف

سكات

فرس جامح

تجرى ف عروقك فضفضة

من قلب داق لهفة وحنان

قام عز ليلة مستحيل

شوقى الطويل

لملم حروف الأغنية حب ووفاق

رجع الصدى نفس المكان

رجفة بكا

نزلت على وتر الكمان

حسيت معاها باختناق

١٩٩٨/١٠/٧

جوانا إيه ؟  
شئ في الحياة عكّرنا ليه ؟  
مجهول على وش السنين مكتوب عليه  
يوقف جميع خطو البشر  
يبعت لهم سيف القدر  
يقفل عليهم جحرهم  
ينحت تماثيله الحجر  
فوق وشهم  
ويبعتر الأيام في سهوة عمرهم  
إحساس يتيم  
بالدنيا لما بتندفن فيها جميع الذكريات  
جوانا إيه ؟  
تهيوّات  
غريبة جدا  
مفردات يأس ومثل  
كرّهنّا في حروف الأمل والأمنيات  
معنى ف دروب الغدر مات

كان ع المدى  
في عيوننا دنيا مربعات  
الخوف ملاها  
روح بتهرب م المتاهة اللي بناها  
لجل تدخل فينا دنيا تساؤلات  
نوصل لفين  
بعد التعود والتمادي في التمرد  
ع اللي فات ؟  
هل محتمل يرجع لنا  
بالحب عصر المعجزات !؟

١٩٩٨/١٠/١٤

ماعدتشي كل الدنيا أرض  
وحياة في روح وعضام وجلد  
لونين مابيننا اتقابلوا صمت  
إحساس برىء بالكبرياء  
تاه جوه عيناً جدل وعند  
معنى ضم لحضنه ضد  
بعدنا لما اشتقتنا بعض  
ولا كان معانا في الفراق  
أبدًا دليل  
مسافات بعيدة  
اتغرّبت فيها القلوب  
لونين لقرص الشمس بينهم ألف حد

شريان حياة وامتد  
جوه الصخر  
ينحت روح ونبض  
وفوق جدار كهفى اللعين  
رسمت لحد  
نام شوقنا طابع مستكين  
تراتيل بتوصل للسما  
وصداها نور بيطل تحت  
قلبين في حيز الإختناق  
رغم التمنى والاشتياق  
كان كل إسم حروفه رفض  
و ند ياما اشتاق لند

١٩٩٩/١/٢٦



ما انتاش فى كونك  
أى واحد  
راح شهيد الأمنيات  
لو فى لونك  
ألف واحد  
كان زمان اليأس مات  
ما فضلش منه للزمن ده  
غير أماكن فى البلاد  
فيها ريحة الذكريات  
ما انت يا ما ف عز صدقك  
سرقوا حلمك م المنام  
صحوا خوفك بين ضلوعك  
طوعوه للزيف مداد  
و استباحوا سنين فى عمرك فرقوها  
أرغموها بقسوة تخضع  
علموها إمتى تركع من سكات  
ما التفوش فى القلب نبضك غير عناد

والليالى بتجرى منك  
قاصدة تهرب م المخاض  
عايزة ترجع للى فات  
و انت واقف

بين حدود الغربة لما للنهاية إعتياد  
كان فى نفسى يتولد لك  
بعد أوضح للحقيقة  
فيه بشاير للميلاد  
والتقيت الشمس طالعة  
يمة تانية  
و الديابة محاوطة زرعك  
لجل توصل للمراد  
حتى شوقك  
ما احتملش يروح لأبعد

و السما لساها عندك  
لابسة توب الخوف حداد  
النجوم الفضة فيها  
لونها مايل للرماد  
إيه جارى لك  
اشتري لك فجر تانى  
يكون جديد  
إشتريه من غير أوان  
يرميه بعيد  
ما تطاو عش الموت فى شوفه  
و اوعى تقبل يوم وقوفه  
بين عقارب الساعات  
خلى بالك م الميعاد  
إن شطبت الماضى مرة  
بكرا تاخذ ع البعاد

١٩٩٩/٩/٢٧



فرس جامح



فرس جامح



وخلى يا حنة من قلبى  
على الشباك غناويكى  
وخبى دموعك الغالية  
على الشجرة اللى علتها حكاويكى  
وانا نعسان على حجر  
بالف الدنيا دى بقلبك وبغنيكى  
وبارجع لك وانا تعبان  
تزيحى الهم عن صدرى  
وتملئ بالرضا قلبى  
تقوم الساقية من بدرى  
وتروى غيطك العطشان  
تميل ع الدار  
شواشى نخلك البردان  
تقيدى النار  
تسوى خبيزك الخمران  
وترمى الحُب للكتاكيت

يعدى نهار  
وانا حاسس بأنى غريب  
ما بين أهلى  
ومحتاج لك  
وجيت طائر  
أطل عليكى م الباب اللى فاتحاه لى  
على الآخر  
بيسبقتنى الحنين ليكى  
وانا خجلان ومتحاصر  
بألف سؤال على وشك  
يا حيلى ليه كده اتأخرت  
ونص الليل بيتاخر  
وطول الوقت باتحامل على نفسى  
واقول فاكر ومانسيتشى  
زمن قلقان على سريرك ما بينامشى

وورق و اقلام ماجفتشی

وخفت اکتب

کرده‌ام

تغیب اکثر مائر جعشی

— واشوف حیرتک

یاست الناس

ولا اقدرشی فی ثانیة انطق

واقول لك يا امه انا مسافر

واراوغ قلبی بالنسیان وانتظار

بانی حانام

اقوم واقلق

لحد الفجر مايشقشق

تهلی علی واستنشق معاه ریحتک

بنفسج لون صفا نفسک

لا متعود علی عتابک ولا خصامک ولا صدک

ومتعود علی صبرک

فرس جامح

وانا باشكى لك الأحوال  
قلعت الدنيا عز البرد ونسيتها على بابك  
ليالى طوال  
لبست الهم ع الجلد اللي متكرمش  
من الزهقة وطولة البال  
وبات عريان من الحسرة على امبارح  
ومن بكرة اللي مش واضح  
في أرض إديكى سويتها بكل حنان  
طلع منه جدا وغربان بيتواعدوا يحاربونى  
يسدّوا على شبّاك  
يحاطونى  
في كل مكان وانا جواكى باتبارك  
وباتشاهد على روى  
وكلى أمان

٢٠٠٠/٣/٢٦



إيه الفرق  
وكل فصول الدنيا اختلفت  
في المواعيد ؟  
حلّ خريف القلب شديد  
بعد ما مر ربيع العمر  
كأنه الطيف  
وجت من بعده ليالى الصيف  
بالريح والبرق  
إيه الفرق ؟  
لو شريان في الجسد الميت  
مد الدم لمليون عرق  
شيء مجهول بينادى على  
من شبابيك العتمة  
اتسرب جوہ عينى  
خلى البرد في قلبى اشتد

لحد ما حد الصبر نفذ  
كان معقول لو اقول الحق  
لازم يرجع قلبي الدافى  
لحضن الشرق  
كان الأمر طبيعى لو اخرج  
من أبواب الدنيا معايا  
بريق الصدق  
كان مفروض العين تحتد  
لما الظلم اتحدد فرض  
إمتى انا كنت باعيش ع الأرض  
وحاسة سعادة  
لما الدمعة بتنزل فوق الآه تتمد  
وتمحى إرادة  
قادرة تموت أجمل وقت  
مش بزيادة

إن عقارب ساعتى الدائرة  
بعكس حياتى

صبحت عادة

بتجرى ف صمت

وأما تعبت ...

طلعت كل فصول الدنيا

منى زوابع

و توب الصبر علىّ انشق

ما استغربت ع المواعيد

و ليه الزمن الحلو بعيد

وانسب وقت الحزن يجينى

ف ليلة عيد

مَتَّ ببطيء

واستسلمت ماقلتش : لا

١٩٩٩/٦/٢١



فرس جامح



فرس جامح

ومين قال لك  
تقول الحق  
وكان حتما نظير صدقك  
يقولوا لا  
مُباح قتلك  
ويا صبرك  
ما فيش واحد هنا زيك  
بيستحلى هوان أسره  
ولا يملكش من أمره  
يفك إيديه من الدائرة  
ويلعب بالزمن وحده  
يغمى عنيه ويتباهى  
بان الغيب ماهوش شايفه  
يغافل دنيتة حبة  
يراهن فيه حياة صعبة  
ولو مرة  
حيجرى إيه ؟  
يا ريت تبدأ  
وقبل المهلة ماتعدى

تدوّر تانى على نفسك  
وتسبق ضيِّك التعبان على السكة  
بيتطوّح

ويتنازل عن امبارح  
عشان مايجيش عليه بكرة  
وياخد فى الشقا مطرح  
ماعدتش طفل ويلعب مع طفلة  
ملك وكتابة ع الرملة ع  
وتيجى الموجة ناوية لهم  
لّتسرق حلمهم منهم  
على غفلة

كبرنا خلاص  
بقينا اتنين مابين الناس  
بنتدّارى ف ملامحهم  
نخاف نفرح لنجرّحهم  
حاولنا كثير نخرّجهم  
من الشرايين  
وما نفعضى

ولا قدرنا في يوم ننتقم ونتمرد  
تأخذني بعيد وتحرّر  
على كيفهم

لعبنا كل أدوارنا  
حفظنا حتى أدوارهم  
ولو ينفع نساومهم  
تكون وحدك وأكون وحدي  
قصيدتي تموت ماتكلمشي  
ويااااه !!

منهم وإيه لونها ف قصايدهم  
وقفت لوحدي أعاندهم  
ضعفت انت

رميت نظرتهم الباردة ورا الأبواب  
وسيعيتك في ألف سؤال بيتكرر  
مالهش جواب في دنيتهم  
هنتقابل أنا وانت بعيد عنهم  
في بكرة

ازاي ؟

سبيل

٢٠٠٠/٥/٣



فرس جامح



فرس جامح





يا أميرة الليل جبان  
من يوميه بالخوف ملان  
كنت فاكرة الليل ده إيه ؟  
صورة منك  
خط أخضر للأمان  
من بعيد يادوب بيان  
لون بيحبى ع الحيطان  
يا أميرة الليل جبان  
قام ودق ع الببيان  
يعمل إيه عصفور صغير بين إيديه  
لما نادى ولبيتيه ؟  
طير مسير  
حام ورفرف بجناحين  
همّة طفى نور عينيكي الطيبين  
وقلب مرمر ..... داس عليه  
واحتمى جواه بضعفه  
ليه برعشة صحيتيه ؟

وحلفت يومها ان نام في حضنك  
حلم واحد تقتليه  
جوه قمقم السنين  
كان في نفسه

تدخليه ؟

يا اااا !

هو فين وانت فين ؟!  
دنيته كات حاجة تانية  
مالك انت بس بيه ؟  
تطلع له  
فوق نخيله تهزى فيه  
تنزلى له  
م السما تملى له نيله  
تدخلى له  
جوه صحرا ف قلب ليله  
تشرقى له  
تغربى له

ترجعي وبالأمر تانى  
غصب عنى  
تشتكى له شوقى ليه  
بس حاسبى يا حبيبتى  
الامتحان ده أرض صعبة  
جبال وتيه  
ليل في ليل  
تقدرى في العتمة دى تنوريه ؟  
تفتحي له باب موارد للنهار  
تزرعى أرض المغارب بالعمار  
ساقيتك بتدور وتسقى  
تحصدى في الشوك وتشقى بالحياة  
لا اااا !  
كبرى حلمك شوية  
رجعى ف عمره العقارب  
والطريق خليه معاه  
يمتلك شمسك وهواه

واللى فات من عمرك إبقى  
اسرقيه من ركن قلبه  
رّوحيه للذكريات  
همّي طيري  
وسيبى همك فوق جزيرة  
يموت وراه  
سبحى وفكى الضفيرة  
ياصغيرة  
وافرحى م القلب ليلة  
هاتى شكلى الأولانى  
مشتاقاه  
باقى لسة ايام كتيرة بتناديه  
وان نويتى تعيشى حرة يا أميرة  
قولى لا  
وانسى لحظة  
ازاي وقعتى من سماكى  
وحبّتيه

٢٠٠٠/١/٨

فرس جامح

صوتك شجى  
لكن حزين  
ولامتى خايف تتبدى  
واصل لفين ؟  
خوفك يادوب كان خطوتين  
وهينتهى  
جواك باشوف  
آخر حدود المملكة  
أكبر كتير  
من عمر حلو بينقضى  
جوه العيون المليانين  
حب وحنين  
قل لى انت مين م المسجونيين  
بين الحروف ؟  
شاعر بايه ؟  
كل القصايد كات وشوش متلونين  
فى العتمة خوف

مافهاش مساحة ضوء  
تكون أبيض نقي  
ولا لون يدلّ أن القلوب  
فيها الغبي وفيها السوي  
مهما حتبعد كل مادا و تختفى  
لساك عنيد وبتشتهي  
فجرك يقوم من رقده بين النجوم  
متشوّقين طلة هلاك  
رويتك بين السنين  
جواك كتير  
فيه ناس تساوى وناس فى قلبك ماتساويش  
من لون دموعك دمعتين  
إسود بلون الشقيانين فوق السطور  
واخضر بيحبي ف أرض بور  
خطوة لمافيش جوه الضلام  
جاهل تمام طعم الحياة  
حتقول لمين ؟

مستنى حبة كدابين يرموا السلام ؟  
متشوقين لحظة سكاتك لو تدوم  
مغرور بابه ؟

فوق عرشك المليون هموم  
فيك شيء غريب ما بينقرش  
ونصدقه


فيك حلم غامض لو نشوفه  
حنشقه

فيك مستحيل ما بينتهيش  
لو تبدأه ترجع صبي  
له قلب طير

عارف حدوده وكوكبه  
سيب الزمن واقف بليد  
بين القوسين

قبلك وبعدك نقطتين  
ياتعيش بسيط وابيض قوى  
ياتعيش حويط أو فهلوى  
واو عاك تقف بين البينين

٢٠٠٠/٦/٥



فرس جامح





وأصعب حاجة

لما تشوف في جسمك جرح

ما تحسوش

بينزف كل ليلة شيء

ما هوش منك

ما هوش في الدم

وإيدك عاصية بتعانذك

ما بتسدوش

ويتهياك انه ف جسم تاني

غريب

ما هوش ملكك

وتنده له

يضيع حسك

ولا تملكش من أمرك

ولا زفرة ألم واحدة

ودمعك فوق وشوش غيرك

بیرسم لك ملامحك

## م الی حیثہ و ماحیثہوش

ویزحف سیل علی قلبک

ويحفر بين ضلوعك خوف

ما تحتملوش

## تسیبہ یروح مکان ما یروح

وتتكم في العروق غيظك

وتتجمّد أحاسيسك

وتتبرأ من اللى كان

## و جای فیه ناس مایتفهموش

وأصعب من ده لو حسيت

## مكان كان ليك

بقي في ثمانية ماهوش ملك

ف

رھان مکتوب علیہ تخسر

مکان تانی یساع همك

ولایهمك

مادام مات اللى كان بیحس

ویتالم

فصدقتی

هتتعلم

ساعتها تعیش بشكل جدید

۲۰۰۰/۷/۷



فرس جامح



فرس جامح



ويحصل قد ما يحصل  
وكله كلام ..... ما يحصلشى  
وتعمل قد ماتعمل  
لكل الناس ماتذكرشى  
فتستاهل مايجرى عليك  
يومين تزعق وماتخافشى  
لناس تزعل ..... وناس تمشى  
وناس توصل لحد لسانك المسنون  
وتتسلسل  
تقف ..... تسمع وتتفرج على الأراجوز  
تقول إيه اللى راح يفضل  
سوى حسك  
تبشوف فوق وشك الهادى  
ملاح غربة بتزلزل سبع تركان



ماتت هزّش ولا تقولش  
عن الزمن اللى جاى يجرى  
من الماضى سنين أطول

مع الحرمان  
وكان مذهبى يا صاحبى  
تنام وتتعود على النسيان  
ونترحم على صورتك  
ويملا مكانك الفاضى  
شريط إسود وفرد حمام  
سابوك ترحل مع الألوان  
لقوك طالع من البرواز  
بتتنطط فى كل مكان  
عينيك تلمع كما البركان  
وعمرك نهر متعكر  
مافيهش أمان

وقلبك طير بيستنظر  
جناح اخضر يشيل همك  
يريح جسمك المنهك  
وتستحمل وتكتم فى الالم وحدك  
تشوف بعينيك  
فتستاهل ما يجرى عليك  
تشوف بعينيك  
قلوب تقسى وتستاسد  
على سيرتك  
يساع قلبك جميع الخلق

و تتراضى مع خصمك  
بحبة شاي عسل صافى  
ولقمة عيش من اللي زمان  
بقت دلوقتي كان ياماكان  
تاكلها وتحمد الرحمن  
على إنك صحيت إنسان  
كما امبارح  
كما أول  
ويحصل قد ما يحصل  
نقول : بكرة هنتعدل

٢٠٠٠/٧/٢٥

فرس جامح



ومد إيديك على الآخر  
وهات العمر لو سافر  
دا انا اللي منتهى سنينك  
وانا اللي بين صوابعينك  
قلم داير على كيفك  
بيرسمنى دواير حب ع الطاير  
قصاد عينك  
فحاذر ..... قلبي مش لعبة  
ولاحبة كلام باير  
يعايرك بيه عدوينك  
دا انا اللي جرحك المقسوم  
وعاش أخرس على جبينك  
عماك طاله  
ولاقدرتش أغير قلبك الجاحد  
وأحواله  
عملت الدنيا مرجيحة  
تطلّعى السما السابعة  
قبال الشمس

ورؤ عني أكون وحدي  
اللى حبيتك  
واكون حكمك وخصمينك  
وانا المجنونة باتشعلق  
في قشاية  
واحس بوشك العابس  
بيضحك مرة ويأيا  
وبيشاكس هدوني همس  
وانا مرهونة  
بين كفين ميزان عمره  
ماكان عادل  
مضيع عمرى م الأول وللآخر  
واروح على فين ؟  
لافيه ميه ولا يابس  
وانا فى النار  
ماليش حول ولا قوة  
تخلي دنيتي تكمل  
فخد حبة رماد وارحل  
يا عاشق موتى فيك خالص

٢٠٠٠/٨/١

أيوه هناك  
مستنياك بين الشجر  
مستغربة لحظة لقاك  
مع إنى واقفة من بعيد  
بالعب معاك فى الرمل  
وارسم دنيتى  
قلبين وسهم  
والف عين شقوا الحجر  
تعاكسنى نظرة من عينيك  
ويجبنى همسك كالنسيم  
يعزف فى قلبى ع الوتر  
يملا الوريد  
إحساس باني مش بشر  
حسيتني كلمة فى السحاب  
نزلت، مطر  
كان يومها عيد  
فيه الملائكة كلها خطوا القدر  
كتبوا الحياة دى ملكنا  
أيوه هناك  
لكن عينيك فيا أنا

ضَيَّ القمر  
جَوَّاه يَلمع شَيء جَرىء  
أَجَرى وورايَا الحَلم يَجَرى عَ الطريق  
يَضحك لَنَا  
وَنَضحك كَتِير  
نَشْتاق ..... نَغِير  
نُشَبِك إِيدينَا ف يَعْضُهَا  
نَنسِي دُموعَنَا وَشُكْلَهَا  
يَمْنَعُنِي صَوْتُكَ وَقَتَّهَا  
يَسْأَلُنِي لِيَه  
هَرَبَانَةٌ مَن قَلْبِ الصُّوَرِ ؟  
قَلَقَانَةٌ مَن هَمَسِ الشَّجَرِ  
أَرْجُو كِي إِنْسَى أَنِي هُنَاكَ  
وَأَنْتَ هُنَا  
وَبِسْرَعَةٍ وَبُجْرَةٍ قَلَمٍ  
بَارِجِعَ عَلَي نَدَاهُ خُطَاكَ  
فَوْقَ الْوَرَقِ  
أَزْعَقُ يَا قَلْبِي مَ الْآلَمِ  
لِيَه صَوْرَتِي كَدَّرَهَا السَّفَرُ

٢٠٠٠/٨/٨

وسبت عينيك في وسط الزحمة  
بتدور على عينا تونسها  
وايد بتضم ع الفرقة  
صواب خوف وتخنفها  
ويتدور قمر ليلنا من الزهقة  
ويرمي الضوء على الرايين وع الجايين  
وفوق الاسفلت كام خطوة  
بتتراحم على الدكاكين  
وتتنور هنا وهناك  
وشوش أكثر  
من المعروضة في الفتارين  
ونضحك ياما  
ع اللي فات وفات وقته  
ومش حاسه  
وجاي عمال بيتكلم مع نفسه  
في شارع كله مية وطنين

لبنى آدمين  
ما عرفتشي تحب ازاي  
ولا إمتى ساعات الفرحة تخلقها  
ولا الدمعة بتنزل ليه  
على الضحكة وتمسحها  
ويجمعنا الطريق خايفين  
زمن يرحل للناس تانية  
بدون عناوين  
نمد الشوف عشان نوصل  
مدى أبعد  
نشوف أحلام بقي لها سنين  
تنام في سكات  
كلام بنرصه في الدواوين  
ونتذكر  
في يوم ما الشاعر الطيب  
وقف قلبه  
على محطة تعب وآهات

## خلص وقته

ماحسش بيه سوى قلبين  
بيتقابلوا معاه في كتاب  
يعدوا عليه في كل صباح  
صباح الخير ياعم فؤاد  
صباح الخير يا أجمل زهرتين حلوين  
مابين ألوفات  
يمد إيديه على الصفحة ويقلبها  
يورينا وتتصالح على كلمة  
ونتواعد مانبعدشى  
ونقعد ع الرصيف تحلى حواديتنا  
ما تخلصشى

## ونص الليل

تقوم دنيتنا في الميادين  
شوارع فاضية نملاها بضحكتنا  
أمل وحنين

تدق الساعة نسال كام  
ونكسر حدة اللحظة بأى كلام  
ونتخبى مع الفرحة من المرواح  
ورا الإشارات  
ونتمنى تعطّلنا  
ونتعب جرّى ويا العين مع الأحلام  
ننام صاحيين  
عشان نحلم بخطوتنا  
في أحلى مكان يساع اثنين  
وسبت الصورة للفنان يكملها  
وكنا الريشة والألوان بنرسمها  
يمد إيديه لأولها  
وتبعدنى الخطوط مسافات  
أنادى عليك تحصلنى  
تمد إيدك توقّفنى  
باحس أنك بعيد أيّوه



في نفس اللحظة احس انك معايا لوحدى

بتقرب وتحصنى

حاولت اهرب كذا مرة

حاولت انت تتوه منى

وما عرفناش

لا يوم نكره

ولا قدرناش

نعيش إلا عشان بكرة

في سكة ماتخلقش عليها

غير احنا

وبعدنا ما فيش إلا

وايه يعنى !

١٩٩٩/١٢/٢٨



فرس جامح



فرس جامح



## صدر للشاعرة :-

١- مشاعر امرأة ١٩٩٦

٢- كم يميل اليك قلبي ١٩٩٦

٣- اكتب عمري ١٩٩٨

## مطبوعات الفجر :

- ١- تغريبة عبوزاق الهلالي ( دراما شعرية ) د. يسرى العزب
- ٢- الهاموش (قصص) حسن نور
- ٣- المبعدون (قصص) إدريس على
- ٤- حكايات مصرية (قصص) د. نجدى إبراهيم
- ٥- الدائرة (رواية) د. نجدى إبراهيم
- ٦- شجرة مريم (شعر بالعامية) د. يسرى العزب
- ٧- قامات فى الفن والثقافة (نقد) د. محمد حسن عبد الله
- ٨- أمسيات عائلية هادنة (قصص) منتصر ثابت
- ٩- شجر الليمون (شعر بالعامية) خالد الشوقاوى
- ١٠- عصفور الحب (شعر بالعامية) نجاة خليل
- ١١- حتى لا يطول الانتظار (قصص) محمد نور الدين
- ١٢- اكتب عمري (شعر بالعامية) ليلى محمد على
- ١٣- زائر بعد منتصف الليل (رواية) مديحة أبو زيد
- ١٤- خاطنة فى الجنة (رواية) يحيى سليمان
- ١٥- النملة و الحداية (شعر للأطفال) عزت زايد
- ١٦- واحد اثنين سرجى سرجى (شعر للأطفال) عزت زايد
- ١٧- المراهن (رواية) سيد أمين
- ١٨- فيكى إيه يتحب ؟ (شعر بالعامية) جلال الصياد